

四庫全書

史部

欽定四庫全書

史部

明史卷一至

三

內閣中書臣瞿照覆勘

總校官編修臣朱 鈐

欽定四庫全書

明史卷一

大學士張廷玉等奉 勅修

本紀第一

太祖一

太祖開天行道肇紀立極大聖至神仁文義武俊德成  
功高皇帝諱元璋字國瑞姓朱氏先世家沛徙句容再  
徙泗州父世珍始徙濠州之鍾離生四子太祖其季也

母陳氏方娠夢神授藥一丸置掌中有光吞之寤口餘香氣及產紅光滿室自是夜數有光起鄰里望見驚以為火輒奔救至則無有比長姿貌雄傑竒骨貫頂志意廓然人莫能測至元四年旱蝗大饑疫太祖時年十七父母兄相繼歿貧而不克葬里人劉繼祖與之地克葬即鳳陽陵也太祖孤無所依乃入皇覺寺為僧逾月遊食合肥道病二紫衣人與俱護視甚至病已失所在凡歷光固汝潁諸州三年復還寺當是時元政不綱盜賊

四起劉福通奉韓山童假宋後起顛徐壽輝僭帝號起  
蘄李二彭大趙均用起徐衆各數萬並置將帥吏侵  
畧郡縣而方國珍已先起海上他盜擁兵據地寇掠甚  
衆天下大亂十二年春二月定遠人郭子興與其黨孫  
德崖等起兵濠州元將徹爾布哈憚不敢攻而日俘良  
民以邀賞太祖時年二十四謀避兵卜於神去留皆不  
吉乃曰得毋當舉大事乎卜之吉大喜遂以閏三月甲  
戌朔入濠見子興子興竒其狀貌留為親兵戰輒勝遂

妻以所撫馬公女即高皇后也子興與德崖齟齬太祖  
屢調護之秋九月元兵復徐州李二走死彭大趙均用  
奔濠德崖等納之子興禮大而易均用怨之德崖  
遂與謀伺子興出執而械諸孫氏將殺之太祖方在淮  
比聞難馳至訴於彭大大怒呼兵以行太祖亦甲而擁  
盾發屋出子興破械使人負以歸遂免是冬元將賈魯  
圍濠太祖與子興力拒之十二年春賈魯死圍解太祖  
收里中兵得七百人子興喜署為鎮撫時彭趙所部暴

橫子興弱太祖度無足與共事乃以兵屬他將獨與徐  
達湯和費聚等南畧定遠計降驢牌寨民兵三千與俱  
東夜襲元將張知院於橫澗山收其卒二萬道遇定遠  
人李善長與語大悅遂與俱攻滁州下之是年張士誠  
據高郵自稱誠王十四年冬十月元丞相托克托大敗  
士誠於高郵分兵於六合太祖曰六合破滁且不免與  
耿再成軍瓦梁壘救之力戰衛老弱還滁元兵尋大至  
攻滁太祖設伏誘敗之然度元兵勢盛且再至乃還所

獲馬遣父老具牛酒謝元將曰守城備他盜耳奈何舍  
巨寇戮良民元兵引去城賴以完托克托既破士誠軍  
聲大振會中讒遂解兵柄江淮亂益熾十五年春正月  
子興用太祖計遣張天佑等拔和州檄太祖總其軍太  
祖慮諸將不相下秘其檄期旦日會廳事時席尚右諸  
將先入皆踞右太祖故後至就左比視事剖決如流衆  
瞠目不能發一語始稍稍屈議分工甃城期三日太祖  
工竣諸將皆後於是始出檄南面坐曰奉命總諸公兵



今甓城皆後期如軍法何諸將皆惶恐謝乃搜軍中所掠婦女縱還家民大悅元兵十萬攻和拒守三月食且盡而太子圖卜戩樞密副使班珠爾瑪克民兵元帥陳額森分屯新塘高望雞籠山以絕餉道太祖率兵破之子林兒於亳州國號宋建元龍鳳檄子興子天叙為都元帥張天佑太祖為左右副元帥太祖慨然曰大丈夫寧能受制於人耶遂不受然念林兒勢盛可倚藉乃用

其年號以令軍中夏四月常遇春來歸五月太祖謀渡江無舟會巢湖帥廖永安俞通海以水軍千艘來附太祖大喜往撫其衆而元中丞曼濟哈雅扼銅城閘馬場河諸隘巢湖舟師不得出忽大雨太祖喜曰天助我也遂乘水漲從小港中縱舟還因擊曼濟哈雅於峪溪口敗之遂定計渡江諸將請直趨集慶太祖曰取集慶必自采石始采石重鎮守必固牛渚前臨大江彼難為備可必克也六月乙卯乘風引帆直達牛渚常遇春先登

拔之采石兵亦潰緣江諸壘悉附諸將以和州饑爭取  
資糧謀歸太祖謂徐達曰渡江幸捷若舍而歸江東非  
吾有也乃悉斷舟纜放急流中謂諸將曰太平甚近當  
與公等取之遂乘勝拔太平執萬戶納克楚總管勒義  
赴水死太祖曰義士也禮葬之揭榜禁剽掠有卒違令  
斬以徇軍中肅然改路曰府置太平興國翼元帥府自  
領元帥事召陶安參幕府事李習為知府時太平四面  
皆元兵右丞阿勒哈中丞曼濟哈雅等嚴帥截姑孰口

陳頤森水軍帥康茂才以數萬衆攻城太祖遣徐達鄧愈湯和逆戰別將潛出其後夾擊之擒頤森并降其衆阿勒哈等引去秋九月郭天叙張天佑攻集慶額森叛二人皆戰死於是子興部將盡歸太祖矣額森尋為民兵所殺從子兆先收其衆屯方山與曼濟哈雅犄角以窺太平冬十二月壬子釋納克楚北歸十六年春二月丙子大破曼濟哈雅於采石三月癸未進攻集慶擒兆先降其衆三萬六千人皆疑懼不自保太祖擇驍健五

百人入衛解甲酣寢達旦衆心始安庚寅克集慶元御  
史大夫福壽死之曼濟哈雅遁歸張士誠水軍帥康茂  
才苗軍帥尋朝佐海軍帥葉撒阿勒哈部將完都等率  
衆降太祖入城召官吏父老諭之曰元政瀆擾干戈烽  
起我來為民除亂耳其各安堵如故賢士吾禮用之舊  
政不便者除之吏毋貪暴殃吾民民乃大喜過望改集  
慶路為應天府辟夏煜孫炎楊憲等十餘人葬御史大  
夫福壽以旌其忠當是時元將鼎鼎扼鎮江拜布哈楊

仲英屯寧國青衣軍張明鑑據揚州巴斯爾布哈駐徽州舒穆魯伊遜守處州其弟和遜守婺州宋巴延布哈守衢州而池州已為徐壽輝將所據張士誠自淮東陷平江轉掠浙西太祖既定集慶慮士誠壽輝強江左浙右諸郡為所并於是遣徐達攻鎮江拔之鼎鼎戰死夏六月鄧愈克廣德秋七月己卯諸將奉太祖為吳國公置江南行中書省自總省事置僚佐貽書張士誠士誠不報引兵攻鎮江徐達敗之進圍常州不下九月戊寅

如鎮江謁孔子廟遣儒士告諭父老勸農桑尋還應天  
十七年春二月耿炳文克長興三月徐達克常州夏四  
月丁卯自將攻寧國取之拜布哈降六月趙繼祖克江  
陰秋七月徐達克常熟胡大海克徽州巴斯爾布哈遁  
冬十月常遇春克池州繆大亨克揚州張明鑑降十二  
月己丑釋繫囚是年徐壽輝將明玉珍據重慶路十八  
年春二月乙亥以康茂才為營田使三月己酉錄囚鄧  
愈克建德路夏四月徐壽輝將陳友諒遣趙普勝陷池

州是月友諒據龍興路五月劉福通破汴梁迎韓林兒都之初福通遣將分道四出破山東寇秦晉掠幽薊其鋒甚銳然至輒屠戮太祖乘福通北驚次第畧定江表所過不殺收召才雋由是人心日附冬十二月胡大海攻婺州久不下太祖自將往擊之舒穆魯伊遜遣將率車師由松溪來援太祖曰道隘車戰適取敗耳命胡德濟迎戰於梅花門大破之婺州降執和遜先一日城中人望見城西五色雲如車蓋以為異及是乃知為太祖



駐兵地入城發粟振貧民改州為寧越府辟范祖幹葉儀許元等十三人分直講經史戊子遣使招諭方國珍十九年春正月乙巳太祖謀取浙東未下諸路戒諸將曰克城以武戡亂以仁吾比入集慶秋毫無犯故一舉而定每聞諸將得一城不妄殺輒喜不自勝夫師行如火不戢將燎原為將能以不殺為武豈惟國家之利子孫實受其福庚申胡大海克諸暨是月命寧越知府王宗顯立郡學三月甲午赦大逆以下丁巳方國珍以溫

台慶元來獻且遣其子闕為質厚賜遣之夏四月俞通海等復池州時耿炳文守長興吳良守江陰湯和守常州皆數敗士誠兵太祖以故久留寧越徇浙東六月壬戌還應天秋八月元察罕特穆爾復汴梁福通以林兒退保安豐九月常遇春克衢州擒宋巴延布哈冬十月遣夏煜授方國珍行省平章國珍以疾辭十一月壬寅胡大海克處州舒穆魯伊遜遁時元守兵單弱且聞中原亂人心離散以故江左浙右諸郡兵至皆下遂西與

友諒隣二十年春二月元福建行省參政袁天祿以福  
寧降三月戊子徵劉基宋濂章溢葉琛至夏五月徐達  
常遇春敗陳友諒於池州閏月丙辰友諒陷太平守將  
朱文遜院判花雲王鼎知府許瑗死之未幾友諒弑其  
主徐壽輝自稱皇帝國號漢盡有江西湖廣地約士誠  
合攻應天應天大震諸將議先復太平以牽之太祖曰  
不可彼居上游舟師十倍於我猝難復也或請自將迎  
擊太祖曰不可彼知我出以偏師綴我而全軍順流趨

所忌非策也乃馳諭胡大海持信州牽其後而令康茂才以書給友諒速來當守江東木橋為內應友諒果引兵東於是命常遇春伏軍石灰山徐達軍南門外張德勝舟師駐龍江關楊璟別以一軍守大勝港太祖親總大軍盧龍山戒將士偃赤幟山之右曰寇至則舉偃黃幟山之左曰幟舉則進軍皆頓首受命乙丑友諒軍薄大勝港楊璟遏之不得前退以舟衝江東橋則已易鐵

石乃移趨龍灣遣萬人登岸樹柵勢甚銳衆欲前擊太祖曰姑飽食當乘雨擊之時方晴衆莫能測已而雲驟起雨大注赤幟舉士卒競前拔柵友諒軍來爭遂合戰而雨適止乃發鼓舉黃幟常遇春伏發徐達等諸軍大集水陸合蹙之友諒軍不能支遂大敗友諒乘別舸走遂復太平下安慶胡大海亦克信州初太祖令茂才給友諒李善長以為疑太祖曰二寇合吾首尾受敵惟速其來而先破之則士誠膽落矣已而士誠兵竟不出丁

外置儒學提舉司以宋濂為提舉遣子標受經學六月  
耿再成敗舒穆魯伊遜於慶元伊遜戰死遣使祭之秋  
九月徐壽輝舊將歐普祥以袁州降冬十二月復遣夏  
煜以書諭國珍二十一年春二月甲申立鹽茶課己亥  
置寶源局三月丁丑改樞密院為大都督府元將薛顯  
以泗州降戊寅國珍遣使來謝飾金玉馬鞍以獻却之  
曰今有事四方所需者人材所用者粟帛寶玩非所好  
也秋七月友諒將張定邊陷安慶八月遣使於元平章

察罕特穆爾時察罕平山東降田豐軍聲大振故太祖  
與通好會察罕方攻益都未卜太祖乃自將舟師征陳  
友諒戊戌克安慶友諒將丁普郎傳友德迎降壬寅次  
湖口追敗友諒於江州克其城友諒奔武昌分徇南康  
建昌饒蘄黃廣濟皆下冬十一月己未克撫州二十二  
年春正月友諒江西行省丞相胡廷瑞以龍興降乙卯  
如龍興改為洪都府謁孔子廟告諭父老除陳氏苛政  
罷諸軍需存恤貧無告者民大悅袁瑞臨江吉安相繼

下二月還應天鄧愈留守洪都辛未降人蔣英殺金華  
守將胡大海郎中王愷死之英叛降張士誠處州降人  
李祐之聞變亦殺行樞密院判耿再成反都事孫炎知  
府王道同元帥朱文剛死之三月癸亥降人祝宗康泰  
反陷洪都鄧愈走應天知府葉琛都事萬思誠死之是  
月方玉珍稱帝於重慶國號夏夏四月己卯邵榮復處  
州甲午徐達復洪都五月丙午命朱文正趙德勝鄧愈  
鎮洪都六月戊寅察罕以書來報留我使人不遣察罕



尋為田豐所殺秋七月丙辰平章邵榮參政趙繼祖謀  
逆伏誅冬十二月元遣尚書張昶航海至慶元授太祖  
江西行省平章政事不受察罕子庫庫特穆爾致書歸  
使者二十三年春正月丙寅遣汪河報之二月壬申命  
將士屯田積穀是月友諒將張定邊陷饒州士誠將呂  
珍破安豐殺劉福通三月辛丑太祖自將救安豐珍敗  
走以韓林兒歸滁州乃還應天夏四月壬戌友諒大舉  
兵圍洪都乙丑諸全守將謝再興叛附於士誠五月築

禮賢館友諒分兵陷吉安參將劉齊知府朱叔華死之  
陷臨江同知趙天麟死之陷無為州知州董曾死之秋  
七月癸酉太祖自將救洪都癸未次湖口先伏兵涇江口  
及湖南甯遏友諒歸路檄信州兵守武陽渡友諒聞太  
祖至解圍逆戰於鄱陽湖友諒兵號六十萬聯巨舟為  
陣樓櫓高十餘丈綿亘數十里旌旂戈盾望之如山丁  
亥遇於康郎山太祖分軍十一隊以禦之戊子合戰徐  
達擊其前鋒俞通海以火礮焚其舟數十殺傷畧相當

友諒饒將張定邊直犯太祖舟舟膠於沙不得退危甚  
常遇春從旁射中定邊通海復來援舟驟進水湧太祖  
舟乃得脫己丑友諒悉巨艦出戰諸將舟小仰攻不利  
有怖色太祖親麾之不前斬退縮者十餘人人皆殊死  
戰會日晡大風起東北乃命敢死士操七舟實火藥蘆  
葦中縱火焚友諒舟風烈火熾烟燄漲天湖水盡赤友  
諒兵大亂諸將鼓噪乘之斬首二千餘級焚溺死者無  
算友諒氣奪辛卯復戰友諒復大敗於是斂舟自守不

敢再戰壬辰太祖移軍扼左蠡友諒亦退保渚磯相持三日其左右二金吾將軍皆降友諒勢益感忿甚盡殺所獲將士而太祖則悉還所俘傷者傳以善藥且祭其親戚諸將陣亡者八月壬戌友諒食盡趨南湖甯為南湖軍所遏遂突湖口太祖邀之順流搏戰及於涇江涇江軍復遮擊之友諒中流矢死張定邊以其子理奔武昌九月還應天論功行賞先是太祖救安豐劉基諫不聽至是謂基曰我不當有安豐之行使友諒乘虛直搗

應天大事去矣乃頓兵南昌不亡何待友諒亡天下不  
難定矣壬午自將征陳理是月張士誠自稱吳王冬十  
月壬寅圍武昌分徇湖北諸路皆下十二月丙申還應  
天常遇春留督諸軍二十四年春正月丙寅朔李善長  
等率羣臣勸進不允固請乃即吳王位建百官以善長  
為右相國徐達為左相國常遇春俞通海為平章政事  
諭之曰立國之初當先正紀綱元氏闇弱威福下移馴  
至於亂今宜鑒之立子標為世子二月乙未復自將征

武昌陳理降漢沔荆岳皆下三月乙丑還應天丁卯置  
起居注庚午罷諸翼元帥府置十七衛親軍指揮使司  
命中書省辟文武人材夏四月建祠祀死事丁普郎等  
於康郎山趙德勝等於南昌秋七月丁丑徐達克廬州  
戊寅常遇春徇江西八月戊戌復吉安遂圍贛州達徇  
荆湘諸路九月甲申下江陵夷陵潭歸皆降冬十二月  
庚寅達克辰州遣別將下衡州二十五年春正月己巳  
徐達下寶慶湖湘平常遇春克贛州熊天瑞降遂趨南

安招諭嶺南諸路下韶州南雄甲申如南昌執大都督  
朱文正以歸文正太祖從子在鎮驕淫恣虐被責慚懼  
謀叛附張士誠羣臣請寘之法太祖不忍加誅安置桐  
城二月己丑福建行省平章陳友定侵處州參軍胡深  
擊敗之遂下浦城丙午士誠將李伯昇攻諸全之新城  
李文忠大敗之夏四月庚寅常遇春徇襄漢諸路五月  
乙亥克安陸己卯下襄陽六月壬子朱亮祖胡深攻建  
寧戰於城下深被執死之秋七月令從渡江士卒被創

發疾者養之死者贍其妻子九月丙辰建國子學冬十月戊戌下令討張士誠是時士誠所據南至紹興北有通泰高郵淮安濠泗又北至於濟寧乃命徐達常遇春等先規取淮東閏月圍泰州克之十一月張士誠寇宜興徐達擊敗之遂自宜興還攻高郵二十六年春正月癸未士誠窺江陰太祖自將救之士誠遁康茂才追敗之於浮子門太祖還應天二月明玉珍死子昇自立三月丙申令中書嚴選舉徐達克高郵夏四月乙卯襲破



士誠將徐義水軍於淮安義遁梅思祖以城降濠徐宿  
三州相繼下淮東平甲子如濠州省墓置守塚二十家  
賜故人汪文劉英粟帛置酒召父老飲極歡曰吾去鄉  
十有餘年艱難百戰乃得歸省墳墓與父老子弟復相  
見今苦不得久留歡聚為樂父老幸教子弟孝弟力田  
毋遠賈濱淮郡縣尚苦寇掠父老善自愛令有司除租  
賦皆頓首謝辛未徐達克安豐分兵敗庫庫特穆爾於  
徐州夏五月壬午至自濠庚寅求遺書秋八月庚戌改

築應天城作新宮鍾山之陽辛亥命徐達為大將軍常  
遇春為副將軍帥師二十萬討張士誠御戟門誓師曰  
城下之日毋殺掠毋毀廬舍毋發丘壟士誠毋葬平江  
城外毋侵毀既而召問達遇春用兵當何先遇春欲直  
擣平江太祖曰湖州張天驕杭州潘原明為士誠臂指  
平江窮蹙兩人悉力赴援難以取勝不若先攻湖州使  
疲於奔命羽翼既披平江勢孤立破矣甲戌敗張天驕  
於湖州士誠親率兵來援復敗之於皂林九月乙未李

文忠攻杭州冬十月壬子遇春敗士誠兵於烏鎮十一月甲申張天驕降辛卯李文忠下餘杭潘原明降旁郡悉下癸卯圍平江十二月韓林兒卒以明年為吳明年建廟社宮室祭告山川所司進宮殿圖命去雕琢奇麗者是歲元庫庫特穆爾與李思齊張良弼構怨屢相攻擊朝命不行中原民益困二十七年春正月戊戌諭中書省曰東南久罹兵革民生凋敝吾甚憫之且太平應天諸郡吾渡江開創地供億煩勞久矣今比戶空虛有

司急催科重困吾民將何以堪其賜太平田租二年應  
天鎮江寧國廣德各一年二月丁未傅友德敗庫庫特  
穆爾將李二於徐州執之三月丁丑始設文武科取士  
夏四月方國珍陰遣人通庫庫特穆爾及陳友定移書  
責之五月己亥初置翰林院是月以旱減膳素食復徐  
宿濠泗壽邳東海安東襄陽安陸及新附地田租三年  
六月戊辰大雨羣臣請復膳太祖曰雖雨傷禾已多其  
賜民今年田租癸酉命朝賀罷女樂秋七月丙子給府

州縣官之任費賜綺帛及其父母妻長子有差著為令  
己丑雷震宮門獸吻赦罪囚庚寅遣使責方國珍貢糧  
八月癸丑園丘方丘社稷壇成九月甲戌太廟成朱亮  
祖帥師討國珍戊寅詔曰先王之政罪不及孥自今非  
大逆不道毋連坐辛巳徐達克平江執士誠吳地平戊  
戌遣使致書於元主送其宗室紳寶大王等北還辛丑  
諭平吳功封李善長宣國公徐達信國公常遇春鄂國  
公將士賜賚有差朱亮祖克台州癸卯新宮成冬十月

甲辰遣起居注吳琳魏觀以幣求遺賢於四方丙午令百官禮儀尚左改李善長左相國徐達右相國辛亥祀元臣余闕於安慶李黼於江州壬子置御史臺癸丑命湯和為征南將軍吳楨副之討國珍甲寅定律令戊午正郊社太廟雅樂庚申詔諸將議北征太祖曰山東則王宣反側河南則庫庫特穆爾跋扈闕隴則李思齊張思道梟張猜忌元祚將亡中原塗炭今將北征拯生民於水火何以決勝遇春對曰以我百戰之師敵彼久逸

之卒直擣元都破竹之勢也太祖曰元建國百年守備必固懸軍深入餽餉不前援兵四集危道也吾欲先取山東撤彼屏蔽移兵兩河破其藩籬拔潼關而守之扼其戶檻天下形勢入我掌握然後進兵元都勢孤援絕不戰自克鼓行而西雲中九原關隴可席卷也諸將皆曰善甲子以徐達為征虜大將軍常遇春為副將軍師二十五萬由淮入河北取中原胡廷瑞為征南將軍何文輝為副將軍取福建湖廣行省平章楊璟左丞周

德興參政張彬取廣西己巳朱亮祖克温州十一月辛  
巳湯和克慶元方國珍遁入海壬午徐達克沂州斬王  
宣己丑以廖永忠為征南副將軍自海道會和討國珍  
乙未頒大統歷辛丑徐達克益都十二月甲辰頒律令  
丁未方國珍降浙東平張興祖下東平棗東州縣相繼  
降己酉徐達下濟南胡廷瑞下邵武癸卯李善長帥百  
官勸進表三上乃許甲子告於上帝庚午湯和廖永忠  
由海道克福州



欽定四庫全書

明史卷二

大學士張廷玉等奉 勅修

本紀第二

太祖二

洪武元年春正月乙亥祀天地於南郊即皇帝位定有天下之號曰明建元洪武追尊高祖考曰元皇帝廟號德祖曾祖考曰恒皇帝廟號懿祖祖考曰裕皇帝廟號

熙祖皇考曰淳皇帝廟號仁祖妣皆皇后立妃馬氏為  
皇后世子標為皇太子以李善長徐達為左右丞相諸  
功臣進爵有差丙子頒即位詔於天下追封皇伯考以  
下皆為王辛巳以李善長徐達等兼東宮官甲申遣使  
覈浙西田賦壬辰胡廷瑞克建寧庚子以鄧愈為征戍  
將軍略南陽以北州郡湯和克延平元平章陳友定死  
之福建平是月天下府州縣官來朝諭曰天下始定民  
財力俱困要在休養安息惟廉者能約已而利人勉之

二月壬寅定郊社宗廟禮冬至祀昊天上帝於圜丘夏至祀皇地祇於方丘太廟以四孟月及歲除五享社稷以春秋二仲月上戊日祭皆親祀癸卯命湯和提督海運廖永忠為征南將軍朱亮祖副之由海道取廣東丁未以太牢祀先師孔子於國學戊申祀社稷壬子詔衣冠如唐制癸丑常遇春克東昌山東平甲寅楊璟克寶慶乙丑定役法三月辛未鑄洪武通寶錢詔儒臣修女誠戒后妃毋預政壬申周德興克全州丁酉鄧愈克南

陽巳亥徐達徇汴梁左君弼降夏四月辛丑蘄州進竹  
簞却之命四方毋妄獻廖永忠師至廣州元守臣何真  
降廣東平丁未裕享太廟戊申徐達常遇春大破元兵  
於洛水北遂圍河南梁王阿掄降河南平丁巳楊璟克  
永州甲子幸汴梁丙寅馮勝克潼關李思齊張思道遁  
五月巳卯廖永忠下梧州潯貴容鬱林諸州皆降辛卯  
改汴梁路為開封府六月庚子徐達朝行在甲申海南  
海北諸道降壬戌楊璟朱亮祖克靖江秋七月戊子廖

永忠下象州廣西平庚寅振恤中原貧民辛卯帝將還  
應天諭達等曰中原之民久為羣雄所苦流離相望故  
命將北征拯民水火元祖宗功德在人其子孫罔恤民  
隱天厭棄之君則有罪民復何辜前代革命之際肆行  
屠戮違天虐民朕實不忍諸將克城毋肆焚掠妄殺人  
元之宗戚咸俾保全庶幾上答天心下慰人望不恭命  
者罰無赦丙申命馮勝留守開封閏月丁未帝至自開  
封己酉徐達會諸將兵於臨清庚戌定軍禮壬子常遇

春克德州丙寅克通州元帝奔上都是月徵天下賢才  
為守令免吳江廣德太平寧國滁和被災田租八月已  
已以應天為南京開封為北京庚午師入大都元監國  
淮王特穆爾布哈死之元亡徐達封府庫圖籍守宮門  
禁士卒侵暴遣將巡古北口諸隘壬申以京師火四方  
水旱詔中書省集議便民事丁丑定六部官制御史中  
丞劉基致仕己卯赦殊死以下將士從征者恤其家逋  
逃許自首新克州郡毋妄殺輸賦道遠者官為轉運災

荒以實聞免鎮江租稅避亂民復業者聽墾荒地復三年衍聖公襲封及授曲阜知縣並如前代制有司以禮聘致賢士學校毋事虛文平刑毋非時決囚除書籍田器稅民間逋負免徵蒙古色目人有才能者許擢用鰥寡孤獨廢疾者存恤之民年七十以上一子復他利害當興革不在詔內者有司具以聞辛巳徐達平元都捷奏至羣臣表賀壬子幸北京改大都路曰北平府徵元故臣癸未詔徐達常遇春取山西甲午放元官人九月

癸亥詔曰天下之治天下之賢共理之今賢士多隱巖  
穴豈有司失於敦勸歟朝廷疎於禮待歟抑朕寡昧不  
足致賢將在位者壅蔽使不上達歟不然賢士大夫幼  
學壯行豈甘沒世而已哉天下甫定朕願與諸儒講明  
治道有能輔朕濟民者有司禮遣乙丑常遇春下保定  
遂下真定冬十月庚申馮勝湯和下懷慶澤潞相繼下  
丁丑帝至自北京戊寅以元都平詔天下丁酉定朝會  
宴饗儀十一月己亥遣使分行天下訪求賢才庚子始



祀上帝於圜丘辛丑建大本堂充以古今圖籍延儒臣  
教授太子諸王甲辰以孔子五十六世孫希學襲封衍  
聖公希大世襲曲阜知縣立孔顏孟三代學癸亥定藉  
田禮詔劉基還十二月丁卯徐達克太原庫庫特穆爾  
走甘肅山西平己巳置登聞鼓壬申改宣徽院置光祿  
司官改太史院置司天監尋又改為欽天監甲戌馮勝  
克平陽

二年春正月乙巳立功臣廟於雞籠山丁未享太廟戊

申定太歲風雲雷雨及嶽瀆山川城隍之祀庚戌詔曰  
朕淮右布衣因天下亂率衆渡江保民圖治今十有五  
年荷天眷佑悉皆戡定用是命將北征齊魯之民饋糧  
給軍不憚千里朕軫厥勞已免元年田租遭旱民未蘇  
其更賜一年頃者大軍平燕都下晉冀民被兵燹困征  
斂北平燕南河東山西今年田租亦與蠲免河南諸郡  
歸附久欲惠之西北未平師過其地是以未遑今晉冀  
平矣西抵潼關北界大河南至唐鄧光息今年稅糧悉

除之又詔曰應天太平鎮江宣平廣德共億浩穰去歲  
蠲租遇旱惠不及下其再免諸郡及無為州今年歲租  
庚申常遇春取大同是月倭寇山東瀕海郡縣二月丙  
寅朔詔修元史壬午耕藉田三月庚子徐達至奉元張  
思道遁振陝西饑戶米三石丙午常遇春至鳳翔李思  
齊奔臨洮夏四月丙寅遇春還師北平己巳命諸子受  
經於博士孔克仁令功臣子弟入學乙亥編租訓錄定  
封建諸王國邑及官屬之制徐達下鞏昌丙子賜秦隴

新附州縣稅糧丁丑馮勝至臨洮李思齊降乙酉徐達  
襲破元豫王於西寧五月甲午朔日有食之丁酉徐達  
下平涼延安張良臣以慶陽降尋叛癸卯始祀地於方  
丘六月己卯常遇春克開平元帝奔和林壬午封陳日  
燧為安南國王秋七月己亥鄂國公常遇春卒於軍詔  
李文忠領其衆辛亥庫庫特穆爾遣將破原州涇州辛  
酉馮勝擊走之丙辰明昇遣使來八月丙寅元兵攻大  
同李文忠擊敗之己巳定內地諸司官制諭吏部曰內

臣但備使令毋多人古來闔寺擅權可為鑒戒馭之之道當使畏法勿令有功有功則驕恣矣癸酉元史成丙子封王顥為高麗國王癸未徐達克慶陽斬張良臣陝西平是月命儒臣纂禮書九月庚子製御寶辛酉召徐達湯和還馮勝留總軍事癸卯以臨濠為中都戊午征南師還東十月壬戌遣楊璟諭明昇甲戌甘露降於鍾山群臣請告廟不許辛卯詔天下郡縣立學十一月乙巳祀上帝於園丘以仁祖配十二月甲戌封阿答阿者

為占城國王甲申振西安諸府饑戶米二石己丑大賚  
平定中原及征南將士庚寅庫庫特穆爾攻蘭州指揮  
于光死之是年占城安南高麗入貢

三年春正月癸巳命徐達為征虜大將軍李文忠馮勝  
鄧愈湯和副之分道北征甲午定朝日夕月禮二月乙  
丑詔續修元史癸未追封郭子興滁陽王戊子詔求賢  
才可任六部者是月李文忠下興和進兵察罕淖爾執  
元平章珠占三月庚寅免南畿河南山東北平浙東江

西廣信饒州今年田租夏四月乙丑封皇子棟為秦王  
桐晉王棟燕王楠吳王楨楚王樽齊王梓潭王杞趙王  
檀魯王從孫守謙靖江王徐達大破庫庫特穆爾於沈  
兒峪盡降其衆庫庫特穆爾走和林丙戌元帝殂於應  
昌子阿裕錫哩達喇嗣是月慈利土官覃屋作亂五月  
己丑徐達取興元分遣鄧愈招諭吐蕃丁酉詔守令舉  
學識篤行之士己亥詔設科取士甲辰李文忠克應昌  
元嗣君北走獲其子密迪哩巴拉降五萬餘人窮追至

北慶州不及而還丁未詔行大射禮戊申祀地於方丘以仁祖配辛亥徐達下興元鄧愈克河州丁巳詔開國時將帥無嗣者祿其家是月旱齋戒后妃親執爨皇太子諸王饋於齋所六月戊午朔素服草履步禱山川壇露宿凡三日還齋於西廡辛酉賚將士省獄囚命有司訪求通經術明治道者壬戌大雨癸亥詔定獄鎮海瀆及郡邑城隍神號各從本稱其前代封號悉罷之壬申李文忠捷奏至命仕元者勿賀謚元主曰順帝癸酉密



迪哩巴拉至京師羣臣請獻俘帝曰武王伐殷用之乎  
省臣以唐太宗嘗行之對帝曰太宗是待王世充耳若  
過隋之子孫恐不爾也遂不許又以捷奏多侈辭謂宰  
相曰元主中國百年朕與卿等父母皆賴其生養奈何  
為此浮薄之言亟改之乙亥封密迪哩巴拉為崇禮侯  
丙子告捷於南郊丁丑告太廟詔示天下辛巳立開中  
鹽法從山西行省請詔商輸米而與之鹽謂之開中其  
後各行省多召商中鹽以實邊儲自五石至一石有差

徙蘇州松江嘉興湖州杭州民無業者田臨濠給資糧  
牛種復三年是月倭寇山東浙江福建濱海州縣秋七  
月丁亥續修元史成丙辰明昇將吳友仁寇漢中叅政  
傅友德擊却之中書左丞楊憲專恣傾險太甲令劉基  
發其奸狀坐誅八月乙酉遣使瘞中原遺骸九月乙卯  
定朝會宴饗樂舞之數是月禮書成名曰大明集禮刊  
行天下冬十月癸亥命周德興為征南將軍討覃屋屋  
遁乙酉始作太廟圭瓚十一月壬辰北征師還甲午告

武成於郊廟丙申大封功臣進李善長韓國公徐達魏國公封李文忠曹國公馮勝宋國公鄧愈衛國公常遇春子茂鄭國公湯和等侯者二十八人已亥設壇親祭戰沒將士庚戌有事於圜丘辛亥詔戶部置戶籍戶帖歲計登耗以聞著為令乙卯封中書右丞汪廣洋忠勤伯御史中丞劉基誠意伯十二月甲子建奉先殿定武臣世襲之制庚午遣使祭歷代帝王陵寢並加修葺己卯賜勲臣田壬午以正月至是月日中屢有黑子詔廷

臣言得失是年占城瓜哇西洋入貢

四年春正月丙戌李善長罷以汪廣洋為右丞相丁亥  
命中山侯湯和為征西將軍江夏侯周德興德慶侯廖  
永忠副之率舟師由瞿塘瀨川侯傅友德為征虜前將  
軍濟寧侯顧時副之率步騎由秦隴伐蜀魏國公徐達  
練兵北平戊子命衛國公鄧愈督餉給征蜀軍庚寅建  
郊廟於中都丁酉享太廟始行裸禮丁未詔設科取士  
連舉三年嗣後三年一舉戊申免山西旱災田租庚戌

定文武官歲祿二月己巳奉先殿成甲戌幸中都壬午  
至自中都元平章劉益以遼東降是月蠲太平鎮江寧  
國田租三月乙酉朔始策試天下貢士賜吳伯宗等進  
士及第出身有差乙巳徙山後民萬七千戶屯北平丁  
未誠意伯劉基致仕夏四月丙戌傅友德克階州文隆  
綿三州相繼下五月免江西浙江秋糧六月壬午傅友  
德克漢州辛卯廖永忠克夔州戊戌明昇將丁世貞破  
文州守將朱顯忠死之癸卯湯和至重慶明昇降戊申

倭寇膠州是月徙山後民三萬五千戶於內地又徙沙漠遺民三萬二千戶屯田北平秋七月辛亥徐達練兵山西辛酉傳友德下成都四州平乙丑明昇至京師封歸義侯八月甲午免中都淮揚及秦滌無為田租己酉振陝西饑是月高州海寇亂通判王名善死之九月庚戌朔日有食之丁丑命州縣設糧長以田多者為之冬十月丙申征蜀師還十一月丙辰有事於園丘庚申命官吏犯贓者罪勿貸是月免陝西河南被災田租十二

月徐達還是年安南淳泥高麗三佛齊暹羅日本真臘  
入貢

五年春正月壬子置親王護衛指揮使司癸丑待制王  
禕使雲南詔諭元梁王巴咱爾幹爾密禕至不屈死乙  
丑徙陳理明昇於高麗戊申定武選法甲戌命魏國公  
徐達為征虜大將軍出雁門趨和林曹國公李文忠為  
左副將軍出應昌宋國公馮勝為征西將軍取甘肅征  
庫庫特穆爾靖海侯吳禎督海運餉遼東命衛國公鄧

愈為征南將軍江夏侯周德興江陰侯吳良副之分道  
討湖南廣西洞蠻二月丙戌安南陳叔明弒其主日燧  
自立遣使入貢却之三月戊申免京民役丁卯都督僉  
事藍玉敗庫庫於圖拉河夏四月己卯振濟南萊州饑  
戍戍始行鄉飲酒禮庚子鄧愈平散毛諸洞蠻五月壬  
子徐達及元兵戰於嶺北敗績是月詔曰天下大定禮  
儀風俗不可不正諸遭亂為人奴隸者復為民凍餒者  
里中富室假貸之孤寡殘疾者官養之毋失所鄉黨論



齒相見揖拜毋違禮婚姻毋論財喪事稱家有無毋惑  
陰陽拘忌停柩暴露流民復業者各就丁力耕種毋以  
舊田為限僧道齋醮雜男女恣飲食有司嚴治之闕粵  
豪家毋閤人子為火者犯者抵罪六月丙子定宦官禁  
令丁丑定宮官女職之制戊寅馮勝克甘肅追敗元兵  
於瓜沙州癸巳定六部職掌及歲終考績法壬寅吳良  
平靖州蠻甲辰李文忠敗元兵於鄂爾坤河宣寧侯曹  
良臣戰沒己巳作鐵榜誠功臣是月振山東饑免被災

郡縣田租秋七月丙辰湯和及元兵戰於斷頭山敗績  
八月丙申吳良平五開古州諸蠻甲辰元兵侵雲內州  
同知黃里死之九月戊午周德興平婁鳳安田諸蠻冬  
十月丁酉馮勝師還是月免應天太平鎮江寧國廣德  
田租十一月辛酉有事於園丘甲子征南師還壬申納  
克楚侵遼東是月召徐達李文忠還十二月甲戌詔以  
農桑學校課有司辛巳命百官奏事啓皇太子庚子命  
鄧愈為征西將軍征吐蕃是年瑣里占城高麗琉球烏

斯藏入貢高麗貢使再至諭自後三年一貢

六年春正月丁未選朝天宮道士供事郊壇甲寅謫汪  
廣洋為廣東叅政二月戊子改羣牧監為太僕寺乙未  
諭暫罷科舉察舉賢才壬寅命御史及按察使考察有  
司三月癸卯朔日有食之頒昭鑒錄訓誡諸王戊申大  
閱壬子命徐達為征虜大將軍李文忠馮勝鄧愈湯和  
副之備邊山西北平乙巳設六科增置給事中甲子命  
指揮使於顯為總兵官備倭夏四月己丑令有司上山

川險易圖祖訓錄成帝自為序頒賜諸王六月壬辰庫  
庫特穆爾遣兵攻雁門指揮吳均擊却之是月免北平  
河間河南開封延安汾州被災田租秋七月壬寅命戶  
部稽渡江以來各省水旱災傷分數優恤之壬子以胡  
惟庸為右丞相八月乙酉建歷代帝王廟於京師冬十  
月辛巳召徐達馮勝還十一月壬子庫庫特穆爾侵大  
同徐達遣將擊敗之達仍留鎮丁巳大輅成先是禮官  
考五輅之制帝以玉輅之奢命作木輅飾以丹漆至是

成甲子遣兵部尚書劉仁振真定饑丙寅冬至帝不豫  
改卜郊閏月乙亥錄故功臣子孫未嗣者二百九人壬  
午有事於園丘庚寅頒分大明律是年暹羅高麗占城  
真臘三佛齊入貢命安南陳叔明權知國事

七年春正月甲戌命都督僉事王簡王誠平章李伯昇  
屯田河南山東北平靖海侯吳禎為總兵官都督於顯  
副之巡海捕倭二月丁酉朔日有食之戊午命修曲阜  
孔子廟堂祭器樂器蠲孔氏荒田租仍設孔顏孟三氏

教授訓其族人是月平陽太原汾州歷城汲縣旱蝗並免租稅夏四月己亥都督蓋玉敗元兵於白酒泉遂拔興和壬寅金吾指揮陸齡討永道諸州蠻平之五月丙寅日歷成丙子免真定等四十二府州縣被災田租辛巳振蘇州饑民三十萬戶癸巳減蘇松嘉湖極重田租之半六月陝西平涼咸安靜寧鄜州雨雹山西山東北平河南蝗並蠲田租秋七月甲子李文忠破元兵於大寧高州壬申倭寇膠州官軍擊敗之壬午寇大任海口

百戶許彰追之戰死八月甲午朔祀歷代帝王廟丁酉  
申定兵衛之制先是洪武元年自京師至郡縣皆置衛  
所至是申定其制辛丑詔軍士陳歿父母妻子不能自  
存者官為存養百姓避兵離散或客死遺老幼並資遣  
還遠宦卒官妻子不能歸者有司給舟車資送乙卯增  
列侯及都督以下官祿庚申振河間廣平順德真定饑  
蠲租稅九月丁丑遣崇禮侯密迪哩巴拉歸冬十一月  
壬戌納克楚侵遼陽千戶吳壽擊走之辛未有事於圜

五十二月戊戌召鄧愈湯和還是年阿難功德國暹羅  
琉球三佛齋烏斯藏薩里輝和爾入貢

八年春正月辛未增祀雞籠山功臣廟一百八人癸酉  
命有司察窮民無告者給屋舍衣食辛巳鄧愈湯和等  
十三人屯戍北平陝西河南丁亥詔天下立社學是月  
河決開封發民夫塞之二月甲午宥雜犯死罪以下及  
官犯私罪者謫鳳陽輸作屯種贖罪癸丑耕藉田召徐  
達李文忠馮勝還傅友德等留鎮北平三月辛酉立鈔



法辛巳罷寶源局鑄錢乙酉免驛夫田租夏四月辛卯  
幸中都丁巳至自中都免彰德大名臨洮平涼河州被  
災田租罷營中都致仕誠意伯劉基卒五月戊辰使中  
官趙成市馬河州己巳命永嘉侯朱亮祖偕傅友德鎮  
北平六月壬寅指揮同知胡汝平貴州蠻秋七月己未  
朔日有食之辛酉改作太廟壬戌召傅友德朱亮祖還  
命李文忠顧時鎮山西北平戊辰詔百官奔父母喪毋  
俟報京師地震丁丑免應天太平寧國鎮江及蘄黃諸

府被災田租八月已酉元庫庫特穆爾卒冬十月丁亥  
詔舉富民素行端潔達事務者壬子命皇太子諸王講  
武中都癸丑改各都衛為都指揮使司乙卯定歲時朔  
望祀陵寢禮十一月丁丑有事於圜丘十二月戊子京  
師地震甲寅遣使振蘇州湖州嘉興松江常州太平寧  
國杭州水災是月納克楚侵遼東指揮馬雲葉旺大敗  
之是年薩里高麗占城暹羅日本瓜哇三佛齋入貢  
九年春正月命中山侯湯和穎川侯傅友德都督僉事

藍玉王弼中書右丞丁玉備邊延安二月乙巳太白晝  
見凡五日三月己卯詔曰比年西征燉煌北伐沙漠軍  
需甲仗皆資山陝又以秦晉二府宮殿之役重困吾民  
平定以來閭閻未息國都始建土木屢興畿輔既極煩  
勞外郡疲於轉運今蓄儲有餘其淮揚安徽池五府及  
山西陝西河南福建江西浙江北平湖廣今年租賦悉  
免之夏四月庚戌雨京師自去年八月不雨至是始雨  
五月癸卯晴自庚戌雨至是始霽六月甲午改行中書

省為承宣布政使司辛丑李文忠還秋七月癸丑朔日  
有食之是日蠲蘇松嘉湖水災田租振永平旱災元將  
巴延特穆爾侵延安傳友德敗降之八月乙酉遣官省  
歷代帝王陵寢禁芻牧置守陵戶忠臣烈士祠有司以  
時葺治分遣國子生修嶽鎮海瀆祠西番多爾濟巴勒  
寇罕東河州指揮寧正擊走之閏九月庚寅以災異詔  
求直言癸巳定百官品秩汰中書省平章叅知政事御  
史臺侍御史殿中治書侍御史等官冬十月己未太廟

成自是行合享禮丙子命秦晉燕吳楚齊諸王治兵鳳陽十一月壬午有事於園丘是月平遥訓導葉伯巨應詔上言分封太侈用刑太繁求治太速帝怒其離間骨肉下獄死戊子徙山西及真定民無產者田鳳陽十二月甲寅振畿內浙江湖北水災己卯送元臣蔡子英出塞子英被獲授官不受久之帝知其不可奪命有司送出塞歸和林遣都督同知沐英乘傳詣陝西問民疾苦是年覽邦琉球安南日本烏斯藏高麗入貢

十年春正月辛卯以羽林等衛軍益秦晉燕三府護衛  
是春振蘇松嘉湖水災夏四月己酉命鄧愈為征西將  
軍沐英為副將軍率師討吐蕃大破之是月振太平寧  
國及宜興錢塘諸縣水災五月庚子命韓國公李善長  
曹國公李文忠總中書省大都督府御史臺議軍國重  
事癸卯振湖廣水災丙午戶部主事趙乾振荆蘄遲緩  
誅六月丁巳詔臣民言事者實封達御前丙寅命政事  
啟皇太子裁決奏聞秋七月甲申置通政司是月始遣

御史巡按州縣八月庚戌改建大祀殿於南郊太祖以  
天地分祭於情弗安詔即園丘壇址建屋為大祀殿每  
歲春首合祀天地癸丑改建社稷壇午門右合祀社稷  
選武臣子弟讀書國子監九月丙辰振紹興金華衢州  
水災辛丑以胡惟庸為左丞相汪廣平為右丞相冬十  
月丙午社稷壇成戊午封沐英西平侯辛酉賜百官公  
田十一月癸未衛國公鄧愈卒丁亥合祀天地於奉先  
殿是月免河南陝西廣東湖廣田租威茂蠻叛命御史

大夫丁玉為平羌將軍討平之十二月乙巳朔日有食  
之丁未錄故功臣子孫五百餘人授官有差是年占城  
三佛齋暹羅瓜哇真臘入貢高麗使五至以嗣王未立  
却之

十一年春正月甲戌封皇子椿為蜀王柏湘王桂豫王  
模漢王植衛王改封吳王楠為周王己卯進封湯和信  
國公是月徵天下布政使及知府來朝二月指揮胡淵  
平茂州蠻三月壬午命奏事毋闕白中書省是月第來



朝官為三等夏四月元嗣君阿裕錫哩達喇殂于特古  
斯特穆爾嗣五月丁酉存問蘇松嘉湖被水災民戶賜  
米一石蠲逋賦六十五萬有奇六月壬子遣使祭故元  
嗣君己丑五開蠻叛殺靖州指揮過興以辰州指揮楊  
仲名為總兵官討之秋七月丁丑振平陽饑是月蘇松  
揚台海溢遣官存恤八月免應天太平鎮江寧國廣德  
諸府州秋糧九月丙申追封劉繼祖為義惠侯冬十月  
甲子大祀殿成十一月庚午征西將軍西平侯沐英率

都督藍玉王弼討西番是月五開蠻平是年暹羅闍婆  
高麗琉球占城三佛齊朶甘烏斯藏彭亨百花入貢

十二年春正月己卯始合祀天地於南郊甲申洮州十  
八族番叛命沐英移兵討之丁申丁玉平松州蠻二月  
戊戌李文忠督理河岷臨鞏軍士乙巳詔曰今春雨雪  
經旬天下貧民困於饑寒者多有其令有司給以鈔兩  
寅信國公湯和率列侯練兵臨清夏五月癸未蠲北平  
田租六月丁卯都督馬雲征大寧秋七月丙辰丁玉回

師討眉縣賊平之己未李文忠還掌大都督府事八月  
辛巳詔凡致仕官復其家終身無所與九月己亥沐英  
大破西番禽其部長三副使十一月甲午沐英班師封  
仇成藍玉等十二人為侯庚申大寧平十二月汪廣洋  
以欺罔貶廣南賜死徵天下博學老成之士至京師是  
年占城爪哇暹羅日本安南高麗入貢高麗貢黃金百  
斤白金萬兩以不如約却之

十三年春正月戊戌左丞相胡惟庸謀反及其黨御史

大夫陳寧中丞涂節等伏誅癸卯大祀天地於南郊罷  
中書省廢丞相等官更定六部官秩改大都督府為中  
左右前後五軍都督府乙巳命南征更調用人二月壬  
戌朔詔舉聰明正直孝弟力田賢良方正文學術數之  
士發丹符驗天下金穀之數戊辰詔文武官年六十以  
上者聽致仕給以誥勅三月壬辰減蘇松嘉湖重賦十  
之二壬寅燕王棣之國北平壬子沐英襲元將托和齊  
於額齊訥禽之盡降其衆夏四月己丑命羣臣各舉所

知五月甲午雷震謹身殿乙未大赦丙申釋在京及臨  
濠屯田輸作者已亥免天下田租吏以過誤罷者還其  
職壬寅都督濮英進兵赤斤站獲故元幽王額琳沁及  
其部曲而還是月罷御史臺命從征士卒老疾者許以  
子代老而無子及寡婦有司資遣還六月丙寅雷震奉  
天門避正殿省愆丁卯罷王府工役丁丑置諫院官秋  
八月命天下學校師生日給廩膳九月辛卯命景川侯  
曹震滎陽侯楊璟永城侯薛顯屯田北平乙巳天壽節

始受羣臣朝賀賜宴於謹身殿丙午置西府官告於太廟以儒士王本杜佑   數杜敷趙民望吳源為春夏官是月詔陝西衛軍以三分之二屯田安置翰林學士承旨宋濂於茂州道卒冬十一月乙未徐達還丙午元平章旺扎勒布哈羅爾布哈侵永平指揮劉廣戰沒千戶王輅擊敗之禽旺扎勒布哈十二月天下府州縣所舉士至者八百六十餘人授官有差命南雄侯趙庸鎮廣東討陽春蠻是年琉球日本安南占城真臘爪哇入貢

日本以無表却之

十四年春正月戊子命徐達為征虜大將軍湯和傅友德為左右副將軍帥師征龜爾布哈命新授官者各舉所知乙未大祀天地於南郊壬子罷天下歲造兵器癸丑命公侯子弟入國學丙辰詔求隱逸是月命郡縣編賦役籍刑官獻獄議請得旨送四輔諫院官給事中覆核無疑始奏行之著為令二月己卯增置各道左右布政使庚辰覈天下官田三月丙戌大赦丁亥復置各道

提刑按察使司先是吳元年置按察使十三年罷至是  
復置辛丑頒五經四書於北方學校夏四月庚午徐達  
率諸將出塞至北黃河擊破元兵獲全寧四部以歸五  
月五溪蠻叛江夏侯周德興討平之秋八月丙子詔求  
明經老成之士有司禮送京師庚辰河決原武祥符中  
牟辛已徐達還九月壬午朔命傅友德為征南將軍藍  
玉沐英為左右副將軍帥師征雲南徐達征北平丙午  
周德興移師討施州蠻平之冬十月壬子朔日有食之



癸丑命法司錄囚會翰林院給事中及春坊官會議平  
允以聞甲寅免應天太平廣德鎮江寧國田租癸丑分  
遣御史錄囚已卯延安侯唐勝宗帥師討浙東山寇平  
之十一月壬午命吉安侯陸仲亨鎮成都己亥置大理  
寺先是吳元年置大理寺尋罷後三年置磨勘司尋亦  
罷至是置寺定員品庚戌趙庸討廣州海寇大破之十  
二月丁巳命翰林春坊官考覈諸司章奏戊戌傅友德  
大敗元兵於白石江遂下曲靖壬申元梁王巴咱爾斡

爾密走晉寧投水死是年暹羅安南瓜哇朶甘烏斯藏  
入貢以安南寇思明不納

明史卷二

欽定四庫全書

明史卷三

大學士張廷玉等奉 勅修

本紀第三

太祖三

十五年春正月辛巳宴羣臣於謹身殿始用九奏樂景  
川侯曹震定遠侯王弼下威楚路壬午元曲靖宣慰司  
及中慶澂江武定諸路俱降雲南平巳丑詔大辟囚皆

減死論乙未大祀天地於南郊庚戌命天下朝覲官各  
舉所知一人二月壬子河決河南命駙馬都尉李祺振  
之甲寅以雲南平詔天下閏月癸卯藍玉沐英克大理  
分兵徇鶴慶麗江金齒俱下三月丙辰改國子學為國  
子監庚午河決朝邑夏四月甲申遷元梁王巴咱爾幹  
爾密及威順王子巴拜等家屬於耽羅丙戌詔天下通  
祀孔子壬辰免畿內浙江江西河南山東稅糧四月乙  
未置錦衣衛丙申殺大理寺卿李仕魯帝崇信沙門高

其官秩頗寄耳目任魯諫不聽遂乞骸骨納笏帝前帝  
大怒命武士捽搏之立死五月乙丑太學成釋奠於先  
師孔子丙子廣平府吏王允道請開磁州鐵冶帝曰朕  
聞王者使天下無遺賢不聞無遺利今軍器不乏而民  
業已定無益於國且重擾民杖之流嶺南丁丑遣行人  
訪經明行修之士秋七月乙卯河決滎澤陽武辛酉罷  
四輔官乙亥傅友德沐英擊烏撒蠻大敗之八月丁丑  
復設科取士三年一行為定制丙戌皇后馬氏崩己丑

命延安侯唐勝宗長興侯耿炳文屯田陝西丁酉以秀才曾泰為戶部尚書辛丑命徵至秀才分六科試用九月己酉吏部以經明行修之士鄭韜等三千七百餘人入見令舉所知復遣使徵之賜韜等鈔尋各授布政使叅政等官有差庚午葬孝慈皇后於孝陵選僧侍諸王冬十月丙子置都察院丙申錄囚甲辰徐達還是月廣東羣盜平詔趙庸班師十一月戊午置殿閣大學士以邵質吳伯宗宋訥吳沉為之十二月辛卯振北平被災

屯田士卒已亥命永城侯薛顯理山西軍務是年瓜哇  
琉球烏斯藏占城入貢

十六年春正月乙卯大祀天地於南郊戊午命徐達鎮  
北平二月丙申初命天下學校歲貢士於京師三月甲  
辰召征南師還沐英留鎮雲南丙寅復鳳陽臨淮二縣  
民繇賦世世無所與夏五月庚申免畿內各府田租六  
月辛卯免畿內十二州縣養馬戶田租一年滁州免二  
年秋七月分遣御史錄囚八月壬申朔日有食之九月

癸亥命申國公鄧鎮為征南將軍討龍泉山寇平之冬  
十月丁丑召徐達等還十二月甲午刑部尚書開濟受  
賂縱囚殺獄官減口與侍郎王希哲等並坐誅是年琉  
球占城西番打箭爐暹羅須文達那入貢

十七年春正月丁未大祀天地於南郊戊申命徐達鎮  
北平壬戌命湯和巡視沿海諸城防倭三月戊戌朔頒  
科舉取士式曹國公李文忠卒甲子大赦天下夏四月  
壬午論平雲南功進封傅友德賴國公陳桓等侯者四



人大賚將士庚寅收陣亡遺骸增築國子學舍五月丙  
寅涼州指揮宋晟討西番於額齊納敗之秋七月戊戌  
禁內官預外事勅諸司毋通內官監文移癸丑詔百官  
迎養父母者官給舟車丁巳免畿內今年田租之半庚  
申錄囚壬戌盱眙人獻天書誅之八月丙寅河決開封  
壬申決杞縣遣官塞之己丑蠲河南諸省逋賦冬十月  
丙子河南北平大水分遣駙馬都尉李祺等振之閏月  
癸丑詔天下刑獄刑部都察院詳議大理寺覆讞奏決

是月召徐達還十二月壬子蠲雲南逋賦是年琉球暹羅安南占城入貢

十八年春正月辛未大祀天地於南郊癸酉朝覲官分五等考績黜陟有差二月甲辰以久陰雷雨雷電詔臣民極言得失己未魏國公徐達卒三月壬戌賜丁顯等進士及第出身有差詔中外官父母歿任所者有司給舟車歸其喪著為令乙亥免畿內今年田租命天下郡縣瘞暴骨丙子初選進士為翰林院承敕監六科庶吉士

己丑戶部侍郎郭桓坐盜官糧誅夏四月丁酉吏部尚書余燦牒祭酒宋訥致仕坐專擅誅丙辰思州蠻叛命湯和為征虜將軍周德興為副將軍帥師從楚王楨討之六月戊申定外官三年一朝著為令秋七月甲戌封王禡為高麗國王庚辰五開蠻叛八月庚戌命馮勝傅友德藍玉備邊北平是月振河南水災冬十月己丑頒大誥於天下癸卯詔馮勝還甲辰詔曰孟子傳道有功名教歷年既久子孫甚微近有以罪輸作者豈禮先賢

之意哉其加意詢訪凡聖賢後裔輸作者皆免之是月  
楚王楨信國公湯和討平五開蠻十一月乙亥蠲河南  
山東北平田租十二月丙午詔有司舉孝廉癸丑麓川  
平緬宣慰使思倫發反都督馮誠敗績千戶王昇死之  
是年高麗琉球安南暹羅入貢

十九年春正月辛酉振大名及江浦水災甲子大祀天  
地於南郊是月征蠻師還二月丙申耕藉田癸丑振河  
南饑夏四月甲辰詔贖河南饑民所鬻子女六月甲辰

詔有司存問高年貧民年八十以上月給米五斗酒三斗肉五斤九十以上歲加帛一匹絮一斤有田產者罷給米應天鳳陽富民年八十以上賜爵社士九十以上鄉士天下富民八十以上里士九十以上社士皆與縣官均禮復其家鰥寡孤獨不能自存者歲給米六石士卒戰傷除其籍賜復三年將校陣亡其子世襲加一秩巖穴之士以禮聘遣丁未振青州及鄭州饑秋七月癸未詔舉經明行修練達時務之士年六十以上者置翰

林備顧問六十以上於六部布按二司用之八月甲辰命皇太子修泗州盱眙祖陵墓德祖以下帝后冕服九月庚申屯田雲南冬十月壬申命官軍已亡子女幼或父母老者皆給全俸著為令十二月癸未朔日有食之是月命宋國公馮勝分兵防邊發北平山東山西河南民運糧於大寧是年高麗琉球暹羅占城安南入貢

二十年春正月癸丑命馮勝為征虜大將軍傅友德藍玉副之率師征納克楚焚錦衣衛刑具以繫囚付刑部

甲子大祀天地於南郊二月壬午閱武乙未耕藉田三  
月辛亥馮勝率師出松亭闕城大寧寬河會州富峪夏  
四月戊子江夏侯周德興築福建瀕海城練兵防倭六  
月庚子臨江侯陳鏞從征失道戰沒癸卯馮勝兵踰金  
山丁未納克楚降閏月庚申師還次金山都督濮英殿  
軍遇納克楚潰軍伏發死之秋八月癸酉收馮勝將軍  
印召還藍玉攝軍事命景川侯曹震屯田雲南品甸九  
月戊寅封納克楚海西侯癸未置大寧都指揮使司丁

西鄭國公常茂坐激散納克楚降軍安置龍州丁未命  
藍玉為征虜大將軍延安侯唐勝宗武定侯郭英副之  
北征沙漠是月城西寧冬十月戊申封朱壽為舳艫侯  
張赫為航海侯是月馮勝罷歸鳳陽奉朝請十一月壬  
午命普定侯陳桓靖寧侯葉昇屯田定邊姚安畢節諸  
衛己丑湯和還凡築寧海臨山等五十九城十二月壬  
申振登萊饑是年琉球安南高麗占城真臘朶安烏斯  
藏入貢



二十一年春正月辛巳麓川蠻思倫發入寇馬龍他郎  
甸都督寧正擊敗之辛卯大祀天地於南郊甲午振青  
州饑逮治有司匿不以聞者三月乙亥賜任亨泰等進  
士及第出身有差丙戌振東昌饑甲辰沐英討思倫發  
敗之夏四月丙辰藍玉襲破元嗣君於捕魚兒海獲其  
次子迪保努及妃主王公以下數萬人而還五月甲戌  
朔日有食之六月甲辰信國公湯和歸鳳陽甲子命傅  
友德為征南將軍沐英陳桓為左右副將軍帥師討東

川叛蠻秋七月戊寅安置迪保努於琉球八月癸丑徙澤潞民無業者墾河南北田賜鈔備農具復三年丁卯藍玉師還大賚北征將士戊辰封孫恪為全寧侯是月御製八諭飭武臣九月丙戌秦晉燕周楚齊湘魯潭九王來朝癸巳越州蠻阿資叛沐英會傅友德討之冬十月丁未東川蠻平十二月壬戌進封藍玉涼國公是年高麗占城琉球暹羅真臘賽瑪爾堪安南入貢詔安南三歲一朝象犀之屬毋獻安南黎季犛弑其主煒

二十二年春正月丙戌改大宗正院曰宗人府以秦王  
榘為宗人令晉王柎燕王棣為左右宗正周王橐楚王  
楨為左右宗人丁亥大祀天地於南郊乙未傅友德破  
阿資於普安二月己未命藍玉練兵四川壬戌禁武臣  
預民事癸亥湖廣千戶夏得忠結九溪蠻作亂靖寧侯  
葉昇討平之得忠伏誅是月阿資降三月庚午命傅友  
德帥諸將分屯四川湖廣防西南蠻夏四月己亥徙江  
南民田淮南賜鈔備農具復三年癸丑命魏國公徐允

恭開國公常昇等練兵湖廣甲寅徙元降王於耽羅是  
月遣御史按山東官匿災不奏者五月辛卯置秦寧柁  
顏福餘三衛於烏梁海秋七月傅友德等還八月乙卯  
詔天下舉高年有德識時務者是月更定大明律九月  
丙寅朔日有食之冬十一月丙寅命宣德侯金鎮等練  
兵湖廣己卯思倫發入貢謝罪麓川平十二月甲辰周  
王橚私居鳳陽坐擅棄其國遷雲南尋罷徙留居京師  
命定遠侯王弼等練兵山西河南陝西是年高麗安南

占城暹羅真臘入貢元伊遜岱爾弒其主特古思特穆爾而立琨特穆爾高麗廢其主禍又廢其主昌安南黎季犛復弒其主日焜

二十三年春正月丁卯命晉王柁燕王棟帥師征元丞相耀珠太尉鼎爾布哈征虜前將軍頴國公傅友德等皆聽節制己卯大祀天地於南郊庚辰貴州蠻叛延安侯唐勝宗討平之乙酉命齊王搏帥師從燕王棟北征贛州賊為亂命東川侯胡海充總兵官普定侯陳桓靖

寧侯葉昇為副將討平之命唐勝宗督貴州各衛屯田  
二月戊申藍玉討平西番叛蠻丙申耕藉田癸亥河決  
歸德發諸軍民塞之三月癸巳燕王棣師次伊都耀珠  
等降夏四月丙申吉安侯陸仲亨等坐胡惟庸黨下獄  
潭王梓自焚死梓妃都督於顯女顯坐胡惟庸黨誅梓  
疑懼與妃皆自焚閏月甲戌詔百官期服毋奔喪丙子  
藍玉平施南忠建叛蠻五月甲午遣諸公侯還里賜金  
幣有差乙卯追論胡惟庸黨賜太師韓國公李善長死

陸仲亨等皆坐誅作昭示姦黨錄布告天下六月乙丑  
藍玉遣鳳翔侯張龍平都勻散毛諸蠻庚寅授耆民有  
才德知典故者官秋七月壬辰河決開封振之癸巳崇  
明海門風雨海溢遣官振之發民二十五萬築隄八月  
壬申詔毋以吏卒充選舉藍玉還是月振河南北平山  
東水災九月庚寅朔日有食之冬十月己卯振湖廣饑  
十一月癸丑免山東被災田租十二月癸亥令殊死以  
下囚輸粟北邊自贖壬申罷天下歲織文綺是年默拉

哈瑪爾高麗占城真臘琉球暹羅入貢

二十四年春正月癸卯大祀天地於南郊戊申以潁國公傅友德為征虜將軍定遠侯王弼武定侯郭英副之備北平邊丁巳免山東田租二月壬申耕藉田三月戊子朔日有食之命魏國公徐輝祖曹國公李景隆涼國公藍玉等備邊陝西乙未命靖寧侯葉昇練兵甘肅丁酉賜許觀等進士及第出身有差夏四月辛未封皇子櫛為慶王權寧王梗岷王穗谷王松韓王模潘王楹安



王樞唐王棟郢王纓伊王癸未燕王棟督傅友德諸將  
出塞敗敵而還五月戊戌命漢衛谷慶寧岷六王練兵  
臨清六月己未詔廷臣參考歷代禮制更定冠服居室  
器用制度甲子久旱錄囚秋七月庚子徙富民實京師  
辛丑免畿內官田租之半八月乙卯秦王楨以怨望召  
還京師乙丑命皇太子巡撫陝西乙亥都督僉事劉真  
宋晟討哈瑪爾敗之九月乙酉遣使諭西域是月倭寇  
雷州百戶李玉鎮撫陶鼎戰死冬十月丁巳免北平河

間被水田租十一月甲午五開蠻叛都督僉事茅鼎討  
平之庚戌皇太子還京師晉王柵來朝辛亥振河南水  
災十二月庚午周王橐復國辛巳阿資復叛都督僉事  
何福討降之是年天下郡縣賦役黃冊成計戶千六十  
八萬四千四百三十五丁五千六百七十七萬四千五  
百六十一琉球暹羅巴什伯里賽瑪爾堪入貢以占城  
篋逆却之

二十五年春正月戊子周王橐來朝庚寅河決陽武發

軍民塞之免被水田租乙未大祀天地於南郊何福討  
都勻畢節諸蠻平之辛丑宥死罪囚輸粟塞下壬寅晉  
王裊燕王棣楚王楨湘王柏來朝二月戊午召曹國公  
李景隆等還京師命靖寧侯葉昇等練兵於河南及臨  
鞏甘涼延慶都督茅鼎等平五開蠻丙寅耕藉田庚辰  
詔天下衛所軍以十之七屯田三月癸未命馮勝等十  
四人分理陝西山西河南諸衛軍務庚寅改封豫王桂  
為代王漢王楨為肅王衛王植為遼王夏四月壬子命

涼國公藍玉征罕東癸丑建昌衛指揮伊魯特穆爾叛  
指揮魯毅敗之丙子皇太子標薨戊寅命都督聶緯徐  
司馬瞿能討伊魯特穆爾俟藍玉還並聽節制五月辛  
巳藍玉至罕東寇遁遂趨建昌己丑振陳州原武水災  
六月丁卯西平侯沐英卒於雲南秋七月庚辰秦王禩  
復國癸未指揮瞿能敗伊魯特穆爾於雙狼寨丁丑改  
詹事院為詹事府八月己未江夏侯周德興坐帷薄不  
修誅丁卯命馮勝傅友德帥開國公常昇等分行山西

籍民為軍屯田於大同東勝立十六衛甲戌給公侯歲  
祿歸賜田於官丙子靖寧侯葉昇坐胡惟庸黨誅九月  
庚寅立皇孫允炆為皇太孫高麗李成桂幽其主瑤而  
自立以國人表來請命詔聽之更其國號曰朝鮮冬十  
月乙亥沐春襲封西平侯鎮雲南十一月甲午藍玉禽  
伊魯特穆爾誅之召玉還十二月甲戌以宋國公馮勝  
頽國公傅友德等兼東宮師保官閏月戊戌命馮勝為  
總兵官傅友德副之練兵山西河南兼領屯衛是年琉

球中山山南高麗哈瑪爾入貢

二十六年春正月戊申免天下耆民來朝辛酉大祀天  
地於南郊二月丁丑命晉王桐統山西河南軍出塞召  
馮勝傅友德常昇王弼等還乙酉蜀王椿來朝涼國公  
藍玉以謀反并鶴慶侯張翼普定侯陳桓景川侯曹震  
舳艫侯朱壽東莞伯何榮吏部尚書詹徽等皆坐誅已  
丑頒逆臣錄於天下庚寅耕藉田三月辛亥命代王桂  
率護衛兵出塞聽晉王節制長興侯耿炳文練兵陝西

丙辰命馮勝傅友德備邊山西北平其屬衛將校悉聽  
晉王燕王節制庚申詔二王軍務大者始以聞壬戌會  
寧侯張溫坐藍玉黨誅夏四月乙亥孝感饑遣使乘傳  
發倉貸之詔自今遇歲饑先貸後聞著為令戊子周王  
橐來朝庚寅早詔羣臣直言得失省獄囚丙申以安南  
擅廢立絕其朝貢秋七月甲辰朔日有食之戊申選秀  
才張宗濟等隨詹事府官分直文華殿侍皇太孫八月  
秦晉燕周齊五王來朝九月癸丑代肅遼慶寧五王來

朝赦胡惟庸藍玉餘黨冬十月丙申擢國子監生六十  
四人為布政使等官十二月頒永鑑錄於諸王是年琉  
球爪哇暹羅入貢

二十七年春正月乙卯大祀天地於南郊辛酉命李景  
隆為平羌將軍鎮甘肅發天下倉穀貸貧民三月庚子  
賜張信等進士及第出身有差辛丑命魏國公徐輝祖  
安陸侯吳傑備倭浙江庚戌詔課民樹桑棗木棉甲子  
詔工部以四方底平收藏甲兵示不復用秋八月甲戌



命吳傑及永定侯張銓率致仕武臣備倭廣東乙亥遣  
國子監生分行天下督吏民修水利丙戌階文軍亂命  
都督寧正為平羌將軍討之九月命徐輝祖節制陝西  
沿邊諸軍冬十一月乙丑賜潁國公傅友德死藍玉既  
誅定遠侯王弼與友德語皆自危帝聞之賜死阿資復  
叛丙平侯沐春擊敗之十二月乙亥賜定遠侯王弼死  
是年烏斯藏琉球緬朶甘瓜哇賽瑪爾堪朝鮮入貢安  
南入貢却之

二十八年春正月丙午階文寇平命寧正以兵從秦王  
檄征洮州叛番丁未大祀天地於南郊甲子西平侯沐  
春擒斬阿資越州平是月周王櫛晉王桐率河南山西  
諸衛軍出塞築城屯田燕王棣帥總兵官周興出遼東  
塞二月丁卯賜宋國公馮勝死己丑諭戶部編民百戶  
為里婚姻死喪疾病患難里中富者助財貧者助力春  
秋耕獲通力合作以教民睦六月壬申詔諸土司皆立  
儒學辛巳周興等自開原追敵至布達密城不及而還

已丑御奉天門諭羣臣曰朕起兵至今四十餘年灼見情偽懲創奸頑或法外用刑本非常典後嗣止循律與大誥不許用黥刺劓閹割之刑臣下敢以請者寘重典又曰朕罷丞相設府部都察院分理庶政事權歸於朝廷嗣君不許復立丞相臣下敢以請者寘重典皇親惟謀逆不赦餘罪宗親會議取上裁法司祇許舉奏毋得擅逮勒諸典章永為遵守秋八月丁卯命都督楊文為征南將軍指揮韓觀都督僉事宋晟副之討龍州土

官趙宗壽戊辰信國公湯和卒辛巳趙宗壽伏罪來朝  
楊文移兵討奉議南丹叛蠻九月丁酉免畿內山東秋  
糧庚戌頒皇明祖訓條章於中外後世有言更祖制者  
以奸臣論十一月乙亥奉議南丹蠻悉平十二月壬辰  
詔河南山東桑棗及二十七年後新墾田毋徵稅是年  
朝鮮琉球暹羅入貢

二十九年春正月壬申大祀天地於南郊二月癸卯征  
虜前將軍胡冕討柳桂蠻平之辛亥命燕王帥師巡大

寧周世子有燉帥師巡北平關隘三月辛酉楚王楨湘  
王柏來朝甲子燕王敗敵於察察爾山又追敗之于烏  
蘭哈達城而還秋八月丁未免應天太平五府田租九  
月乙亥召致仕武臣二千五百餘人入朝大賚之各進  
秩一級是年琉球安南朝鮮烏斯藏入貢

三十年春正月丙辰命耿炳文為征西將軍郭英副之  
巡西北邊丙寅大祀天地於南郊丁卯置行太僕寺於  
山西北平陝西甘肅遼東掌馬政己巳命左都督楊文

屯田遼東己卯改太常光祿二司為寺改儀禮司為鴻臚寺是月沔縣盜起詔耿炳文討之二月庚寅水西蠻叛命都督僉事顧成為征南將軍討平之三月癸丑賜陳郊等進士及第出身有差庚辰古州蠻叛龍里千戶吳得鎮撫井孚戰死夏四月己亥命都指揮齊讓為平羌將軍討之壬寅水西蠻平五月壬子朔日有食之乙卯命楚王楨湘王柏帥師討古州蠻六月辛巳策試禮部下第舉人賜韓克忠等進士出身有差己酉駙馬都

尉毆陽倫坐販私茶賜死秋八月丁亥河決開封甲午  
命李景隆為征虜大將軍練兵河南九月庚戌漢沔寇  
平戊辰麓川平緬土酋刀幹孟逐其宣慰使思倫發以  
叛乙亥命都督楊文為征虜大將軍代齊讓冬十月戊  
子停遼東海運辛卯命耿炳文練兵陝西乙未重建國  
子監先師廟成十一月癸酉命沐春為征虜前將軍都  
督何福等副之討刀幹孟是年琉球占城朝鮮暹羅烏  
斯藏尼博囉入貢

三十一年春正月壬戌大祀天地於南郊乙丑遣使之  
山東河南課耕二月乙酉倭寇寧海指揮陶鐸擊敗之  
辛丑古州蠻平名楊文還甲辰都督僉事徐凱討平麼  
些蠻夏四月庚辰廷臣以朝鮮屢生釁隙請討不許五  
月丁未沐春擊刀幹孟大敗之甲寅帝不豫戊午命都  
督楊文從燕王棣武定侯郭英從遼王植備禦開平俱  
聽燕王節制閏月癸未帝疾大漸乙酉崩于西宮年七  
十有一詔曰朕膺天命三十有一年憂危積心日勤不



急務有益于民顧起自寒微無古人之博知好善惡惡不及遠矣今得萬物自然之理其奚哀念之有皇太孫允攸仁明孝友天下歸心宜登大位内外文武臣僚同心輔政以安吾民喪祭儀物毋用金玉孝陵山川因其故無改作天下臣民哭臨三日皆釋服毋妨嫁娶諸王臨國中毋至京師諸不在令中者推此令從事卒如堊孝陵謚曰高皇帝廟號太祖永樂元年謚神聖文武欽明啟運俊德成功統天大孝高皇帝嘉靖十七年增謚

開天行道肇紀立極大聖至神仁文義武俊德成功高  
皇帝帝天授智勇統一方夏當肇造之初沉幾觀變次  
第經略綽有成算嘗與諸臣論取天下之略曰朕遭時  
喪亂初起鄉土本圖自全及渡江以來觀羣雄所為徒  
為生民之患而張士誠陳友諒尤為巨蠹士誠恃富友  
諒恃強朕獨無所恃惟不嗜殺人布信義行節儉與卿  
等同心共濟初與二寇相恃士誠尤逼近或謂宜先擊  
之朕以友諒志驕士誠器小志驕則好生事器小則無

遠圖故先攻友諒鄱陽之役士誠卒不能出姑蘇一步  
以為之援向使先攻士誠浙西負固堅守友諒必空國  
而來吾腹背受敵矣二寇既除北定中原所以先山東  
次河洛止潼關之兵不遽取秦隴者蓋庫庫特穆爾李  
思齊張思道皆百戰之餘未肯遽下急之則併力一隅  
猝未易定故出其不意反旆而北燕都既舉然後西征  
張李望絕勢窮不戰而克然庫庫特穆爾猶力抗不屈  
向令未下燕都驟與角力勝負未可知也帝之雄才大

略料敵制勝率類此故能勘定禍亂以有天下語云天  
道後起者勝豈偶然哉

贊曰太祖以聰明神武之資抱濟世安民之志乘時應  
運豪傑景從勘亂摧強十五歲而成帝業崛起布衣奄  
奠海宇西漢以後所未有也懲元政廢弛治尚嚴峻而  
能禮致耆儒考禮定樂昭揭經義尊崇正學加恩勝國  
澄清吏治修人紀崇風教正後宮名義內治肅清禁宦  
豎不得干政五府六部官職相維置衛屯田兵食俱足

武定禍亂文致太平太祖實身兼之至於雅尚志節聽  
蔡子英北歸晚歲憂民益切嘗以一歲開支河暨塘堰  
數萬以利農桑備旱潦用此子孫承業二百餘年士重  
名義閭閻充實至今苗裔蒙澤尚如東樓白馬世承先  
祀有以哉

明史卷三